

taonga whakamiharo. Ko etahi e mau ana, ko etahi e taka ana. Kaore i te kura te he.

E tika ana, kia tangi nui matou te iwi Maori ki a korua ko to tuakana kaati, tera ano te wa mo te iwi. Ko tenei poroporoaki na nga tamariki nei, me o ratou kai-whakaako. E koa ana matou mo korua ko to tuakana ka noho nei ki Niu Tirenī. Ko te tumanako kia noho tonu korua i roto i te iwi Maori, hei awhina haere i nga mahi whakapiki i te iwi. Ma te Atua korua e manaaki i nga tau maha e takoto mai nei, mana hoki e manaaki te kura o Hukarere ka mahue iho nei i a korua.

I konei ka mauria mai e Mihi Mere Hooro te tohu aroha a te kura, he rihi hiriwa (entree dish) kei runga e mau ana enei kupu i te reo pakeha.

Kia a Miss Emily Bulstrode, he tohu aroha he tohu whakawhetai, na nga kai-whakaako me nga tamariki o Hukarere.

I tapaea hoki he tiki ki aia, he aroha mai na Ruiti Matene o Tikitere rana ko tana tamahine. Te tunga mai o Miss Emily, ka ki: "Kaore e taia e ahau te kimi he korero hei whakaatu i te aroha ki a koutou. Kia ora katoa koutou. I nui rawa ta koutou whakapau moni hei aroha ma koutou ki a au. E kore rawa e wareware i a au to koutou aroha nui ki a au. Ko taku tamanako k'a pena hoki ta koutou manaaki i a Miss Hall me ta koutou manaaki i a au. Ma te Atua koutou katoa e manaaki e awhina.

## WHARE-KARAKIA MO HUKARERE.

Ko nga kahi hou enei o Hune nei.

|                                       | £   | s. | d. |
|---------------------------------------|-----|----|----|
| Na te komiti wahine o Ohinemutu ...   | 10  | 0  | 0  |
| Na Misses Bulstrode ...               | 58  | 0  | 0  |
| Na Ngati Porou per Sir A. T. Ngata... | 100 | 0  | 0  |

Ko te whakatoputanga o nga moni katoa kua takoto £766 17s 6d.

## TE ORA MO TE MAORI.

### Na Professor Condliffe.

(Kua tu a Professor Condliffe hei kai-whakahaere mo te ropu rongonui o te ao e ingoatia nei ko "The Pacific Relations." Kei Honolulu te kainga. Ko ia tetahi o nga kai-whakaako (Professor) o te kura nui i Christchurch i nua tata ako nei. He turanga whakamiharo toa inaianei. Kei roto hoki a Takuta Te Rangihiroa i taua ropu.)

I tono mai taku hoa a Peneti kia tuhituhia e ahau he kupu maku ki te iwi Maori. He nui taku koa mo tenei waimarie oku ki te tuku kupu atu hei mau ma Te Toa Takitini ki nga marae maha o te iwi Maori. He iwi tenei e miharoitia, e arohaina ana e toku hinengaro, me te kaha o toku whakapono tera e piki haere te ahuatanga o te iwi Maori.

Taku mahi he titiro haere i te ahua o nga kaupapa i timata ake ai to tatou ahua e noho nei i Niu Tirenī. Ahakoa he pakeha ahau, kaore i te ngaro i ahau te nui o nga painga mo tatou e noho nei i Niu Tirenī i whakakaupapatia mai e te taha ki te iwi Maori. A he putake tenei e tika ana kia mau i roto i nga whakaaro o te